

1.August-Rede 2018

Werter Bezirksrat, liebi Gersauerinne und Gersauer, liebi Gäscht vo usswärts, es freut mich sehr, dass ich hüt, hie i minere Heimatgmeind die 1. August Aasprach dörf ha.

Wo mich de Bezirksammann Thomas Rieben aagfragt het, ob ich die 1. Augustrede hie halte möcht, hani zwar zerscht scho chli zögeret und es het au en Momänt gä won ich ihm ha welle absägä!

Zu was für Theme söll ich denn da Rede, hie a üsem Nationalfiirtig, han ich denn de Thomas gfragt.....und sini Antwort isch gsii: ich häig en „ Carte Blanche“.....aha...super hani dänkt.....ich bi ja en Sportler vo längst vergangene Tage und normal stahd ja öppe en Politiker da vorne am Rednerpult und verzellt öppe we d Schwiiz entstande isch und uf hüt bezoge, we d Schwiiz sött funktioniere und in Zukunft uusgseh!

Und was söll ich ächt da vore verzelle?

Entscheidend sind die nächschte drüü Wort vom Thomas gsii, dass ich jetzt da vornä stah...

Gersau isch anderscht.....heder gseit.

Wahrhaftig, Gersau isch eimalig und anderscht und de cha ja au mal en andere als en Politiker da vorä stah hani dänkt!

Sofort isch mer de i dem zämähang no de Spruch i Sinn cho

„ Gersau bleibt Gersau, ein freies Volk ein freies Land“

**de Spruch het sich irgendwie i min Hinterchopf ibrännt
siit minere Chindheit....er isch ufere Huusmuure uf
mim Schulwäg gschriibä gsi, a de Ränggstrass 17, det
wo lang de Lehrer Spirig drinn gwohnt het. Hüt
chammer de Spruch no ufem Dorfbrunne am
Rathuusplatz läse!**

**Ich hane do als Chind sehr oft au gläse , und mier
eigentlich nüd wiiters dänkt!**

**Was der Spruch eigentlich für en Bedüütig het, und
mer de au cha uf d Schwiiz bezieh.....das isch mer
eigentlich erscht im Verlauf vo minere Velokarriere so
richtig Bewusst worde.**

**So verzell ich hüt da es paar Erfahrighe us minere
Velokarriere
won ich im In und Ussland gmacht ha. Zwüschet inne
wird's au mal chli Politisch.....**

**Ich wott jetzt aber au niemer hie Nötige, die Red da
z loseund ha absolut keis Problem, wenn jetzt
öpper zu de Ursula gahd e Bratwurst und es Bier go
hole und öppe innere viertel Stund wieder chunt!**

**Zerscht verzell ich no churz wie ich überhaupt zu dem
Sport cho bi und wie alles aagfange het! Ich bi ja hie
im Ried in Gersau als 5. und letschts Chind innere
Buurefamilie ufgwachse. Sport isch mal abgseh vo
mim zweitältische Brüder em Leo keis grosses Thema
gsii! Er het mich de aber a einti oder anderi Lauf
mitgnu und so chamber säge das ich zerscht**

eigentlich Läufer gsii bi. Mis allererschtli Veloränne isch de da obe um d Fidme ume gsi, im Jahr 1982 als 11 jährige. Ich ha no keis eignigs Velo ghaund mit em viel z grosse Velo vo minere ältere Schwöschter bini 4. worde.

Zwei ganz entscheidendi Pünkt sind wohl verantwortlich, dass es näbe mim Talent bi mier i junge Jahre ghaue het.

1. E grosse Sportförderer in Gersau i de Person vom Marzell Camenzind. Ihm hani eigentlich alles z verdanke. Er hed mit üs junge Rennfahrer unzähligi Stunde trainiert und isch mit üs Wuchenänd für Wuchenänd ad Ränne gfahre.

De zweiti Punkt isch, dass ich vo Huus us null Druck gha ha.

Es git us minere Sicht nüd Schlimmers i junge Jahre, als wenn d Eltere ihre eignig sportliche Überergiz a ihrnä Junge wend uusläbä und sie aatriebid. Das chund meischtens uf Duur nid guet. Hingäge Jungi fördere und unterstütze im Sport isch uf jede Fall aber immer guet.

Bi mier isch das grad anderscht gsii. Ich hät natürlich aligs sölle ufem Buurehof mithälfe. So han ich mim Vater ganz am Afang aligs gseid ich müess id Ministranteprob.....debii bini de alligs go trainiere.

Au mis erschte Velo hani nid eifach so übercho, sondern zu 50% sälber usem Sackgäld müesse zahle. Ich ha also zerscht chli müesse Kämpfe für min Sport.

Nach 5 Jahre Schüeler und Anfängerkategorie bini de 1988 und 89 is Juniorennationalkader cho und ha det die erschte Int. Ränne chönne fahre. Es sind grad no die letschte Jahr vorem Ändi vom iisige Vorhang gsii.

So sind det no Näme uf de Nationalliibli vo de Gägner gstande we CSSR für Tschechoslowakei....UDSSR für Sowjetunion und DDR für Ostdeutschland.

Ei Erkenntnis hani us dere Ziit gwunne....nid wers beschte Material und Verpflegig hed, isch immer de Schnellschti. So sind die Fahrer vom Oschte mit teilwiis uralte Velos a Start cho und au ihri Verpflegig isch rächt unkonventionell gsii.....so hemmer i de Ränne beobachtet, dass sii eifach Verpflegig vom Morgebüffe hine im Tricot inne gha hend....u.a kochti Eier und Joghurt.

I dene Mehretapperänne sind sie üs Schwiizer meischtens überläge gsii....ja we hättemer au sölle Konkurrenzfähig sii?

Mier Schwiizer sind all id de Lehr gsii und sie sind mit 17, 18 Jahre scho Profi gsii.

1989 hani den chönne ad Junioren WM uf Moskau und ha denn mit eigne Auge mal gseh we de Sport det Funktioniert hed.

Vorem Einzelränne hemmer no es 70km Mannschaftsfahre quer dur Stadt Moskau gha..... 2 Runden a 35km. Es het denn gheisse mir chögid öppe 3 tag vorem Ränne am Abig vom 5i bis am 7ni det go trainiere uf dere Streckiüs aber gfragt we das

söll gah, angesichts des scho damaligen riesige Verkehrs i dere Stadt.

Und das het denn so funktioniert:

Mer hed mit Lastwage 100i vo Militarische uf dene 35 km verteilt und innert 5 bis 10 Minute isch die 4 spurig Strass komplett und hermetisch gesperrt gsi....und das wohlverstande für'n es Training für Junioren.

Es zweits Erläbnis isch mer denn aber scho no rächt iigfahre.

Gleichzeitig hend im Olympiastadion vo Moskau au d Bahnwettkämpf für Juniore stattgfunde. So simmer mal nach üsem Training det üsi Kollege go aaführe.

Das wo mier de aber iigfahre isch , isch nid obe im Stadion gsii, sondern was unne inne abglaufe isch.

Det unne inne hend ganz jungi Meitli vom Sowjetische Nationalkader Kunstturne trainiert. Under de stränge Auge vo mehrere Trainer hend sie unglaublichi Sache gmacht. Meh hed keis vo denne Mädis gseh laache und teils sind au Träne gflosse.

Ich ha nachher no mängisch a di Szenerie zruggdänkt wenn ich mal nid so motiviert gsii biund bi de nachher mit minere Situation grad wieder z friede gsii.

Ja so het de Sport dazumal im Ostblock funktioniert....Profitum scho im Chindsalter.....wers schafft ad Spitze au Rhum füre Staat....wers nid schafft hed eifach Päch gha.....körperliche Schade incl.

Au mini besagte Gägner usem Ostblock wo üs dazumal um d'Ohre gfare sind, sind nachher irgendwo i de Versänkig verschwunde.

Wie gsehd das eigentlich hüt bi üs ide Schwiiz us mit de Sportförderig?

Ich muess säge d Schwiiz hed rächt lang brucht bis sie im Sport sägemer mal es einigermasse konkurrenzfähiges System gha hed. Erscht im 2006 hed Swiss Olympic es bruchbars Konzept mit Understützig au vom Bund uf Bei gstellt. Aber au hüt hends jungi Talent i de CH immer no schwierig Sport, Schuel oder Uusbildig unter ei Huet z bringe. Genau i dem Alter hörid viili uf oder gönd Talent verlore.

Es bruucht uf jedefall i dem Alter viil Durchsetzigschraft und Wille.....Ziit für anderi Sache bliibid da nid.

Zu minere Ziit heds das uf jedefall alles no gar nid gä.....und au de Spitzesportler RS, was hüt gid, isch erscht nachher iigführt worde.

Üse Nationaltrainer wo us Ostdeutschland cho isch, het au immer gseit das mir i de Schwiiz wäge Lehr und RS öppe 3 Jahr i de sportliche Entwicklig hinde dri sigid gägenüber üsne Gägner.

Uf jede fall hani bis uf mis letschte Amateurjahr immer näbem Sport nu 50% gschaffed. Und denn bini plötzlich scho 24gi gsii und obwohl ich eigentlich

immer zu de beschte Amateur i de CH ghört ha, hani immer no kei Profivertag gha.

Denn hani alles uf ei Karte gsetztha min Job kündt....und mir no genau eis Jahr gäentweder chummi denn imene guete Profiteam undere oder ich hänge alles a Nagel nach dem Jahr und ga wieder go schaffe. Will ewig Amateur bliibe het für mich kei Zuekunft gha.

Durch die langi Amateurziit hani aber doch eigentlich a die interessantische und exotische Rundfahrte chönne gah vo mim Läbe. Japan, Südafrika, Namibia, Kolumbien und Guatemala um es paar z nänne.

D Schwiiz ein freies Volk ein freies Land.....was das heisst hani am iidrücklichschte irgendwo in Guatemala amene Abig erfahre. Di arm indianisch Bevölkerig isch do zwische de Fronte vo Guerillia und Paramilitär gsi.....

Nachem Nachtässe simmer no chli go Bei vertrampe und de immene Lokal no eis go trinke. Plötzlich isch s Militär mit Maschienengwehr innegstürmt und alli hend müesse usem Lokal. Üs het mer la Laufe und die iiheimische hend sich dusse anere Wand müesse ufstelle und meh hed sie nach Waffe durchsuecht.....einige hed me de au mitgnu.

Üsä Puls isch bi dere Aktion e so höch gsii we amene Rännä....

In Südafrika hed no Apartheid gherrscht womer vor de Rundfahrt no es zweiwüchigs Trainingslager in

Johannisburg gha hend! Obwohl mer d Townships vo Soweto immer grossrümig umfahre hend simmer zweimal us fahrende Autos mit Eisenstange bedroht worde. Ebeso heds gheisse me söll am Abig us Sicherheitsgründ mit em Auto nie ame Rotlicht komplett Stoppe, sondern immer chli fahre.....

Und no es Münsterli i sache Korruption! A de WM in Kolumbien heds OK a jedere Nation au us Sicherheitsgründ zwei Polizischte zur Verfüegig gstellt. Nur hend die nid nur für üsi Sicherheit gsorged, sondern no gliichziitig versuecht üs Goldketteli, Uhre und anders z verkaufe.

Liebi Bürgerinne und Bürger us de Schwiiz.....

am 25. November 2018 döfid sii wieder mal go Abstimme.....und wüssed Sie über was?

Über die Hornkuh Initiativeja genau!

Der krassi Wächsel i dere Rede isch natürlich bewusst!

Mängisch muess ich mich eifach kneife, wemer i de Schwiiz über gwüssi Sache diskutierid . Gahds üs nid herrlich, wemmer über setigi Problem ob Küh söllid Horä ha oder nid chönd go Abstimme? Ich bi sicher, i de meischte Länder vo dere Wält wär das absolut keis Thema....vielleicht no am eheschte in Indien wo Küh heilig siged.

Verständ mich nid falsch...die Initiative isch absolut berächtigid ...sie isch schliesslich mit knapp 120000 offiziell

beglaubigte Unterschrifte zstand cho.

Das isch direkti Demokratie....das Volk...der Suverän hat das letzte Wort.

Und um genau die Regierigsform wo mier da i de Schwiiz hend beniidids üs teils scho i üsne Nachbarländer.....geschweige denn i ganz viele Länder wos Volk gar nüd z säge hed!

Zuegä....au ich bi natürlich nid immer iverschtande mit allne Entscheidige wo z Bärn obe oder bi Abstimmige gfelt werdät.....ja wer isch das scho?

Aber es isch eigentlich wie im Sportmal gwinnsch, mal chusch eis ufe Deckel über.....!

Aber de muess me sich mängisch au wieder vor Auge halte, das das Politische System womer i de Schwiiz hend , quasi immer e Kompromissentscheid zwüschet Links und Rechts, genau üses Erfolgsgeheimnis isch und Schwiiz so erfolgrich gmacht hed!

Der einzig Kritikpunkt wo mier persönlich i dem ganze System nid passt, sind die Lobbyisten in Bern obe....

Hüt cha ja jedes Ratsmitglied in Bern obe a zwei sogennante

Interessenvertreter de zuegang is Bundeshuus erlaube.....Stand hüt, hets also ca. 200 Lobbyiste im Bundeshuus us jentschte Branche..... z.b Pharma, Gwerkschafte, Unternäme und Dachverbänd usw.

Und dere ihri Uufgab isch natürlich nüd anders als üsi gwälte

Politiker für Ihri Interesse z gwinne.

Das finde ich persönlich chli gfährlich.

Immerhin sind Bestrebige im gang, dass alles chli Transparenter wird und mer d'Aazahl wot reduziere.

Üs Schwiizer seit mer ja grundsätzlich Bescheidenheit und Zrugghaltig nache. Das sind ja eigentlich ganz gueti Eigenschafte.

Nur, mängisch wünschti ich mier vo üsne Politiker meh Kampf und Engagement für d Schwiiz, vorallem i gwüssne Verhandlige mit Brüssel. Mier wend immer chli d Musterknabe sii und s Gsetz vo de EU de nu gnauer umsetze als Ihri Mitgliedsstaate sälber. D Schwiiz hed nämlich au einigi gueti Trümpf i de Hand. Ich danke jetzt nur mal a üsi Nord – Südachse.... ich verglichs jetzt wieder mit em Sport.... wenn am Start stahsch und öppis nur halbwegs wotsch, gwinnsch au garantiert au kei Bluemetopf.

Nachdem ich jetzt voll id Politik abdriftet bi, möcht ich jetzt zum Schluss wieder zum Sport zrug cho und no chli verzelle wes mier als Profi so gange isch.

Nachdem ich 1995 i mim letschte Amateurjahr 11 Ränne gwunne ha, hets denn endlich klappt mit em Profivertrag! Ja ich ha sogar chönne uslase zwüsche zwei guete Teams in Italie. Dazumal sind vieli gueti Teams us Italie cho, es isch quasi s Eldorado vom Radsport gsii.

Es isch eigentlich rückblickend es Stock - Konservativs Team gsii.....Scho bim unterschriebe vom Vertrag heds gheisse.... eine mit Ohrering wellids de öppe gar nid.....langi Haar wärid au verpönt gsii...

Fraue im Team, we für Physiotherapie oder Masseurinne, heds au nid gä..... s hed gheisse die brächid nur Uhruh is Team.....ja es isch e sowit gange, dass mier de zweit Sportlicheiter Leiter gseit hed wenn ich d Heime döf Sex ha oder nid.....chönd üch jetzt sälber vorstelle öb sich de Oscar dra ghalte hed oder nid.....!

Zur Antwort auf diese Frage meldet sich ein Kursschiff der SGV mit Kurs auf Gersau durch lautes Hornen!

Defür bin uf ei Schlag Millionär worde.....30 Mio. Lire isch s Mindestsalär für Neoprofi gsii.....d Lire sind do aber so im Käller unde gsii, es hed nidemal 2000 Fr. Fixlohn gä...!

Aber das isch mier do eigentlich alles gliich gsii.....Hauptsach ich bi ändlich Profi gsii.

Süschi isch das Team aber top gsii.....klein aber fein! S isch alles sehr professionell und guet organisiert gsii. Nur.... de Radsport isch en Teamsport und en Sport mit Hirarchiä.....als Neoprofi fasch du ganz unde aa.....so bisch de erscht im Team wo mues nachefüere wenn öppis isch.....muesch go Fläsche hole, hinde im Teamauto.....chusch de schlächtisch Masseur über im Team.....und au ad Ränne wirsch geschickt wos dich grad bruched.

Ich muess sägä, ich ha i mim erschte Jahr als Profi zerscht scho rächt herts Brot müesse ässe. Aber scho i mim erschte Profijahr bin ich i dere Hirarchi gstige..... nid z letscht will ich immer bedingigslos für d Mannschaft gschaffed ha und de erschti Sportlicheiter mis Talent gseh hed und er mier i de Ränne immer meh Friiheite gä hed!

Endgültig gmerkt hani das, wo üses Team uf 1997 is dazumal Weltbeste Team Mapei integriert worde isch. Nur 50% vo üsem Team hend en Vertrag bi Mapei übercho....und ich bi debii gsii.

Das Velofahre au sehr viel mit Taktik z tue heh hani do natürlich scho gwüsst.....und das nid immer de stärchschi gwinnt au....aber dass das genau mich i mim Heimränne a de Tour de Suisse 97 trifft, das hätti nie dänkt.

Ich ha de Prolog gwinne und bi de scho de dritti Tag im gälbe Tricot dur Schwiiz dure gfahre, wo durne fatale Fehlentscheid vo minere Mannschaftsleitig, e Spitzegruppe mit 11 Minute in La Chaux de Fonds aachoo isch.

Chuum bin ich i dere Etappe über Ziellinie gfahre hend sich d Medie uf mich gstürzt und mich natürlich gfragt, was da los gsii sig, mit dem Team Mapei.....obwohl ich innerlich stärnsverruckt gsii bi, han ich de so guet es no gange isch miis Team i Schutz gnuu!

De Teamleiter, wo mier de ganz Schlamassel iibrokt het , hed uf jedefall det kei Interview gä und hed sich schnellschtmöglich usem Staub gmacht.

Mit ere Wut im Buuch bini de no bis uf 2 Minute anecho.....aber es isch de bim 2. Platz blube.....die TdS 97 hani defintiv verschänkt.

Aber dur die Niederlage, hani au sehr viel glernt für de rescht vo minere Karriere.

Denn ischs Jahr 1998 cho wo de äbä für mich am 11. Oktober mit em Wältmeischtertitel Krönig gfunde hed.

Am Ändi vo dem Jahr 1998 hani mier müesse sägä: „Erschtens kommt es anderst und zweitens als man denkt“

We wohl jede Sportler, plant me mit em Team sii Saisonhöhepunkt vor de Saison.....

Bi mier wär das Tour de Suisse 98 gsi.... Ich wäri serscht mal als Käpten vonere Mannschaft a Start gange, und wär de alleinigi Leader gsii!

Unmittelbar vor dere TdS bini am Giro d Italie als Helfer 4. worde! Gäge Ändi vo dem Giro, hani de leider Sitzbeschwärde übercho, wo vor mim grosse Saisonziel de TdS, no schlimmer worde sind. D Schmerze sind immer schlimmer worde... und statt a de TdS bini de uf em Operationstisch glandet, und mis grosse Saisonziel s Heimränne gwinne, isch bachab gange.

D Entüschig isch riisig gsi...

Ich ha denn e längerer Rännpause gha.....und ha de aafang August mit de Portugalrundfahrt wieder aagfange! Die Portugalrundfahrt erwähne ich hie eigentlich numme, wills ja momentan au bi üs heiß isch!

Aber siit do.... weiss i wirklich was heiß isch!

Di ganze zwei Wuche isch det zwische 38 und 43 Grad gsii.....und mier sind natürlich we immer am Nachmittag gstartet wos bsunders schön warm gsii isch.

Wills im Hinderland vo Portugal im August no gärä Waldbränd git, hemmer zii tewis au no döfe dur Rauchschwade durefahre.

Am ändi vo dere Rundfahrt hani zu mim Sportliche Leiter gseit:

Die Rundfahrt bini gnau zweimal gfahre.....s erscht und s letschtmal.....

Ich bi de im September no a de Spanierundfahrt gsii und ha de gäge ändi scho gmerkt, das es eigentlich vo Tag zu Tag immer besser lauft!

Mis vermeintlich Päch vom Summer, mit de lange Rännpause het sich plötzlich als Glück usegestellt.....ich bi zum Saisonändi no frisch und vorallem hungerig gsii.....

Obwohls i dene zwei Wuche zwüsche Spanierundfahrt und WM, hie i de Region oft gränet het, hani 3 mal, meh als 7 Std trainiert und so d WM Distanz simuliert.....ich ha nurnu de 11. Oktober im Chopf gha.

Am Friitig vor de WM bini uf Valkenburg aagreist und am Abig uf de Strecki go trainiere.....und bi im erschte momänt rächt entüschgt gsii....mini Analyse isch gsii....wenns dumm lauft chömed da am Schluss 20 bis 30 Fahrer i Sprint!

Aber öppis het alli Fahrer näbe em Parcours im vorfäld au no beschätigt.....uf de Sunntig 11. Oktober isch himmeltrurig Wätter aageit gsii.

**Und tatsächlich.....a dem Sunntig heds numme einisch
gschiffed.....6...7 Grad isch gsii und we sichs für
Holland ghört, hed au d Windmühli a de Strecki numme
einisch we wild trüllet.**

**Wäge dem nasse und chalte Wätter ischs Ränne vom
Start äwäg sehr schnell gsiii und hed nach 200 km
extrem selektioniert.....**

**Wes uusecho isch, wüssid ja da z Gersau ziemlich
all.....und süsch chönd er s Ändi ganz modärn uf
Youtube go nacheluege.....**

**Was da in Gersau abgange isch, han ich nur vom ghörä
sägä vernu.....schiins hägid d Chileglogge glütet und
es heig e Friinacht gä.**

**Ich bi i dene 10 Jahre als Profi immer zwüsche 30 und
35000 km im Jahr gfahre.**

Insgesamt 23 Jahr Veloränne gfahre....

**Uf die 1. Augustred ane hani extra mal ufere
Wältcharte gluegt..... i weviel Länder ich i all dene
Jahr velogfahre bi...**

Ich bi de uf 36 Länder cho!

**Zwiifelsohni gids mäenge schöne Fläche uf dere
Wält.....aber s Gsamtpaket i de Schwiizliebi
Bürgerinne und Bürger.... isch glaub ich absolut
unerreicht. Mängisch wenn ich Tagesschau luege,
chönnt mer zwar meine,**

**vor luuter Negativem und Angstmacheriii, i Zuekunft
gängs mit de Schwiiz nur nu bachab.**

**De dänk ich alligs, nach allem wo ich uf dere Wält
gseh ha.....welles Land, wenn nid Schwiiz, sötti die**

zuekünftige Problem nid chönne löse? Ich, uf jedefall luege positiv i Zuekunft.

D Schwiiz het sich de Standard wommer hüt da hend, aber au über alli Jahr müesse erkämpfe und erschaffe. Denn vo nüt chund eifach nüt.....

D Schwiiz het aber i ihrer Gschicht sicher au oft Glück ga, dass sie vo Krieg verschont blube isch, ich danke da vorallem as letschte Jahrhundert zugg.

Ich, liebi Zuhörerinne und Zuhörer bi uf jedefall sehr dankbar das ich hie, i dem wunderschöne Gersau und i de Schwiiz gebore worde bi und hie döf Läbe.... für mich persönlich gids nüd schönere uf dere Wält...

Ich danke allne hie, für ihri Aufmeksamkeit und wünsche allne no e ganz schöne 1. August